

意苕山館詩稿

意苕山館詩稿卷五

元和陸 嵩希孫著 男懋修九芝校

壬寅

張詠仙選官懷遠不赴作此寄之

出處頻商共一愁撫時感事總悠悠春歸半月猶冰雪夢  
繞三更自斗牛貧仕敢辭千里遠親衰難惜一身謀王尼  
得免牛車歎滄海從來有橫流

雜感

雄郡猶資賊援師敢遽爭劇愁梁棟盡都作舳艫橫賊折屋材  
造月落千燐聚烽騰萬壘驚更憐旁縣地婦女早捐生  
禍未天心厭烽連歲暮紅如何嫌谷雪獨阻甬江風昨冬四明

無入市仍多虎鳴郊更少鴻賊中情孰刺一港隔難通  
不料重洋隔真能一葦杭盜兵原赤子漁利雜姦商解散  
庸無術驅除或未遑首功知有在河上且翱翔  
全師聞臘盡猶未過蘇州勢或資遙控人誰識老謀本來  
歌舞地自足羽毛求獨有圍城裏深宵哭未休  
忍使衣冠族長居虎豹村王師雖不戰中國有常尊譴但  
平原獲營誰細柳屯何能違衆議一鼓縛孫恩

送人之官潁州

西湖記泛水粼粼送爾何堪正曉春千里風塵勞遠望一  
官俎豆獨相親解談管鮑風知古曾住歐蘇俗便醇絕勝  
戴公山下路黃鸝嘯斷不逢人

夷船入乍浦煙販閩姦殺青皮軍以應

日日江頭說防堵又報夷船入乍浦乍浦近與吳淞連江  
南恃此作門戶閭閻聞信那弗驚紛然捆載謀逃生城門  
乍出便遭劫兵雖未被已哭聲我思大兵久雲集重鎮何  
繇賊竟入昨有逃人來賊中細訴令我生嗚咽禦敵但用  
青皮軍倒戈忽出烏煙謀駐防營中烈火焚光燄直逼吳  
淞濱督師參贊駐何所誰能使賊不犯江南寸土安我江  
南民嗚呼誰能使賊不殺江南民我方筮易恐震鄰

題趙忠毅感遇十二詩墨蹟後蹟藏金陵某寺

一生浩氣貫清蒼感遇詩成早激昂臣節風霜操簡勵君  
恩日月荷戈長倉皇姦魄褫崔魏涕泣忠魂弔左楊遺墨

應煩龍象護摩挐空與論興亡

見說

見說東南第一州  
羈栖三載感悠悠  
江山文藻空前日  
城郭風雲冷素秋  
寂寞人倫推德操  
思量風俗有陳留  
屋廬深處吾原愧  
野草閒花笑白頭

悲吳淞爲陳將軍

化成作

海濤萬丈環吳淞  
礮臺險扼分西東  
東臺高插旗不紅  
賊來獨向西臺攻  
西臺將軍萬夫雄  
一怒作氣如長虹  
礮擊賊船賊膽落  
殺氣忽報東臺空  
東臺空賊螳登  
將軍所擁惟親兵  
雖然養士素有恩  
衆寡勢異難力爭  
將軍不死和議不得成  
嗚呼將軍非不明  
以身迎礮賊亦驚  
誓死報國

不與懦帥俱偷生從將軍而死者幾十人徒令江東數郡  
百姓哭失聲可憐將軍未死日自行陣久親歷刀亦不  
能傷矢亦不能射不信孤軍殞此夕君不見關家壯繆老  
子孫先時援絕殉虎門北面再拜謝 國恩礮來不避甘  
殺身傷心豈獨陳將軍

### 感事

江南本水國自古利舟戰身手誇黃頭飲飛矢輕悍如何  
蹢躅夷遇之輒奔竄承平百餘年民不見兵亂轟然聞礮  
聲得免勢先換乘鉞況巍巍高居有成算非無勇敢徒殺  
傷痛過半舸艤海空橫摧燒作薪爨

防禦紛海疆徵調徧南北郡縣所經過騷騷苦供億賊來

競奔逃賊去肆剽磔呼號慘閭閻血肉路狼藉幸彼豕突  
夷所志但財帛不然東南隅長驅勢誰敵天遠問誰告官  
兵撤宜亟

官兵調不足下令團鄉民鄉民習耨鉏那解刃殺人應募  
但游手本皆椎埋倫卒聞賊船至四散奔郊村因之恣淫  
掠荼毒耳忍聞其中狡黠徒更利姦夷銀倒戈或前導潰  
亂先官軍誅之不勝誅痛矣將誰論

潰亂知何因猥云礮猛利我思礮所施豈在肘腋地先登  
苟共爭短兵雜相繼誰能十步內轟擊不自避下吳想開  
平竹端布交繫礮來隨低昂破之固有計書生豈知兵舊  
史尙粗記軍門敢妄陳和我正爭議

讀明史

風塵四海問誰清  
水火中朝尙暗爭  
告警東南朝絡繹  
傳烽西北暮從橫  
指揮太息材官盡  
旄鉞頻煩上相行  
報答殊恩惟養寇  
不應但恨左家兵

寶劍親聞賜尙方  
驚心賊勢轉披猖  
元戎自愛留宣鎮  
諸將何繇及汴梁  
橫海樓船淹落日  
防邊鐵甲冷新霜  
武功一代分明紀  
對罷平臺豈遂忘

甘泉望斷捷書來  
旁午軍需日夜催  
肯信兵端開互市  
祇聞國計重輸財  
職官傳在名難紀  
貨殖書成事可哀  
狹巷短兵誰殺賊  
一時枉費沈郎才

鍾山王氣未全收  
報國何人善策籌  
已歎專征少俞戚  
可



堪枚卜但溫周朝方議撫宵仍叛臣自營私主獨憂一捷  
祇聞傳石砧從來婦女解同仇

得沈鼎甫少司空都中書感賦

補牘連章事豈虛九重萬里望欬歔全師未見濟荀偃一  
死先傳託史魚玉帛犧牲謀自老耄鉏荆棘恨同餘安危  
從此無人問愁絕司空一紙書

哀鳳行

禁林百鳥聲不揚忽聞老鳳鳴朝陽足足節節識何語似  
欲啄斷怪鳥吭怪鳥何年此飛集直先老鳳棲梧桐其背  
尖利尾禿速不類鴟鵂非鵠鵠呼羣引類徧霄漢鵠鵠紛  
避鸞遐翔一朝爰居至海上饗以鐘鼓禮非常蒼鷹偶然

效搏擊喙尙未舉身先戕始知怪鳥力甚大能使羽族皆  
歸王朝朝暮暮赴丹闕居然和假聲歸昌上帝高居那得  
識信之遂若眞鳳皇鳳皇雖然噤不語忍與上下相頡頏  
飢餐竹實渴飲露終荷上帝恩難忘誓欲奮翼起翦撲一  
洗天宇還清蒼九閭深閉叫不磨拌以冤血灑大荒可憐  
鳳生八九子畏禍不敢排天閭一鳴那更老鳳繼怪鳥之  
勢悲逾猖

讀元次山道中示官吏篇書後

天寶昔喪亂道州幸獨全賊退示官吏哀此元結篇非有  
制賊力窮苦蒙賊憐今者崇明縣孤寄大海邊城小得安  
堵幸免豈有天此邦號富饒知久垂賊涎天際縱可恃防

禦終宜先賊艦滿吳淞日夜傳烽煙私憂欲誰告那得猶  
晏眠

與路質軒應延話別

君之老友吳仲倫昔者遇我之江濱爲我道君不置口言  
君非是今之人我聞君名未一面何幸同官此相見三載  
知君道誼深舉世如君俗可變仲倫端人友必端知君富  
貴浮雲看除書朝下暮引疾於古非易今其難我欲留君  
惜君老送君未免傷懷抱忽念風塵猶未清恨不隨君歸  
去早君歸百事知非憂所悲已失耦耕儔煩君爲告仲倫  
墓明年定擬從君游

木香花下作

冷淡羞爲時世妝春風也自倚芬芳如何一逐沾泥絮飛  
上枝頭便不香

羽書

羽書連日報倉皇軍令嚴城篴鎗忙漫說雁門多閒謀忽  
驚博浪索逃亡悲聲動地淒風色殺氣環營暗日光莫怪  
腐儒憂獨切圖山聞道撤新防

送孖旋里

子身拌得付蟲沙何處還容暫寄家離散一時先僕役倉  
皇盡日少舟車極天烽火哀征雁滿地鉦鼙愴亂鴉知道  
故鄉能否達死生從此各天涯

圍城

消息圍城斷連朝祇自驚旌旗閒不動刁斗寂無聲但說  
軍機密微聞撫議成儒生何得問始信此官輕

常州糧臺呈周子愉

項觀察

江頭徒步哭誰聞一席還容此地分本愧非才稱博士且  
操蠻語學參軍淒涼鼓角回征壘慘淡旌旗黯陣雲越石  
中宵空起舞底須殺賊始論勦

示里中親舊

不分重相見猶疑是夢中音書連月斷道路幾時通驚喜  
妻孥在流離故舊同且休論往事明日又飄蓬

有聞賊中事者詩以答之

我從賊中來請言賊中情賊始破城入手卽釋甲兵貴賤

略無別相遇但掩睛以此當揖讓跳躍如鼉鼉出入儼游  
戲異志彼豈萌其形本如鬼彼亦鬼自名誰能輕一死乃  
與鬼相爭所惜鬼散處不虞我暗偵我苟聚精銳倉卒乘  
三更上流復縱火巨艦焚從橫何難盡厥類殲戮空城垓  
徒然竭金幣毒害貽蒼生 聖恩自寬大諸將誰忠誠國  
恥誓一雪海寓還清平小臣比螻蟻性命微且輕感慨發  
私議試聽心忪忪

有客餽筆研賦謝

避亂未與筆研俱竄身荆棘原無需今者浮蹤幸稍定思  
此未免心煩紆感君知我急持贈開籤懼喜同瑾瑜研似  
東坡舊鳳咮筆比右軍生鼠須我雖學書未成就二物豈

便忘須臾政如親故久離別意外相見翻驚吁所恐入手  
或生澀類彼健臂疏彎弧方今醜夷尙驕橫正當草檄伸  
天誅雕鐫風月識何用以此相贈慙迂儒安得風塵盡除  
埽蟲魚箋注仍吾徒

江州述感

奉檄趨江洲慰勉感父老父老爲我言賊情頗了了白者  
乃真鬼語音類禽鳥脰長面多毛眼綠疾顧睒脅從半丐  
流肌肉黑如棗見人輒搖手牲畜需一飽所志但剽掠姦  
淫雜醜狡誰云力過人摧拉亦易倒初來各驚惶疾走棄  
孩抱號哭滿路衢顛蹶或溝瀦久知不足畏家室謀各保  
因之聚鄰里鳴鑼約驅討父老言未終我淚已擗擗止止

勿復談一語爾當曉深仁念我 朝養育徧蒼皓經歷二  
百年覆載比大造何容蠶爾夷深入肆殘擾如何專閫謀  
獨恨撫不早我欲有所言未言先懊惱疇非食毛臣敢忘  
恩浩浩父老聽我語感激指蒼昊鼙鼓儻見徵逆賊誓同  
埽嗚呼田野徒何嘗習戈鉸踊躍且如此紛紛愧羽葆  
聞和議有成夷船將出江去感而有作

督臣朝返朱雀桁夷船夜達金陵城金陵城中人大驚烽  
火照耀日不明伊節相來爭郊迎謂今和議必有成船如  
何堅礮如何利東南半壁勢將傾吾 皇所念惟蒼生張  
皇入告 皇自聽將軍參贊各各面有喜色形朱提二千  
一百萬所利甚溥豈獨歡夷情請加國璽申此丹書盟不



謂侮慢乃以尊我 共主名夷船三月江頭停行大饗禮  
正覺古寺揮旗旌衮衣赤舄觴自行卑卑縣丞胡獨心不  
平耳語制府此可劫以兵制府驚起怒叱汝肉足食汝當  
烹縣丞叩頭請死不敢更有聲今日奏上闕明日議下廷  
夷船出江去中外懽聲騰海內從此歌太平嗚呼憤憤獨  
有此縣丞嗚呼憤憤乃有此縣丞

送王佐卿

廣佑

歸通州

十日圍城裏惟君生死同可堪離別意復此一宵中漫擬  
投戎幕聞誰數戰功歸帆宜急挂堂有白頭翁

重至潤城示諸同學

本是尋常過從人相逢亂後覺情親全家分寄偏愁問故

壘重尋各愴神到眼江山餘劫火極天關塞莽風塵思量  
舊日弦歌地戎馬曾經感慨頻

尋甘露寺

寺門半掩喚誰應  
經閣重尋月暗升  
忽見滿階堆落葉  
始知亂後久無僧

葉青原入都過潤不值卻寄

同此餘生在難忘報國情  
爾猶能殺賊我恨未知兵  
消息三年斷烽煙兩地驚  
天教慳一面轉免涕從橫

青原曾  
殷夷船

難定後追感往事述所聞見成新樂府三首

報賊船

朝報賊船來暮報賊船來  
賊船不來報何爲叩頭請死悔

莫追是何武弁愚可哀一夕紅旗閃星斗賊船何忽來京  
口此時倉卒計何有上策無如棄城走大兵自可金陵守  
吁嗟乎賊來未來報何爲武弁多事真堪哀

焚鹽艘

老虎涇頭私梟聚喜見夷船京口據便思相埒肆獷猖駕  
礮插刀挂帆去道逢夷船語未通夷人疑是官軍遇一礮  
燬其桅再礮碎其柁私梟落水死無數鹽白如霜化煙霧  
百萬金錢燄中付吁嗟此輩皆健兒殺人如草驚平時胡  
弗同仇助王師不作忠義鬼乃并不得馬革裹其尸一害  
未去一害除爲禍爲福吾得知

金陵圍

金陵圍城不開居民依舊紛往來吁嗟居民爾何恃輸賊  
皇皇書一紙誓不食言有如水爭城殺人古或然知賊今  
來不爲此君不見邗江城接京江城一葦可至賊不爭賊  
船祇向瓜州橫何不金錢亟爭醪贖城早令賊船去

雜感

陣雲未合鼓頻搥帳外軍先乏食譁聞道餘糧猶萬斛底  
須午夜更量沙

一任揚帆隔岸行終宵鼓角不聞聲孤城早識仍難守應  
悔江頭自撤兵

和戎上策漢家無枉寫明妃出塞圖誰信一書通絕域千  
秋爭說霍家奴

防堵仍聞論不休塞河斷港有奇謀可知鐵鎖沈江後依  
舊樓船到石頭

調餉徵師總枉勞釋兵杯酒自稱豪如何當日崑崙宴入  
座曾無儂智高

海內從今罷戰爭始知慷慨誤談兵只愁落日吳淞口潮  
捲忠魂怒未平

京江都護行

臨江大府開都護保障東南作門戶桓桓都護彼何人樹  
鸞鳴騶自雄武大言螳賊不足滅所慮姦民或雜處四城  
堅閉禁出入形迹稍疑卽膏斧森嚴號令孰敢違所部偏  
裨況如虎屹屹金塘鐵鷲堅雄兵據守應安堵忽聞賊騎

來倉皇狹巷爭趨棄弓弩青州戍卒獨何爲轉戰城頭日  
方午爾時都護尙傳令賊敗開城急追虜須臾城陷賊盡  
登都護何時死歸府

青州兵歎

青州駐防兵爾胡不防青州城來此乃隸京口營京口駐  
防二千甲自謂驍勁無與衡朝從都護耀戈戟暮從都護  
鳴鼓鉦胡然賊衆踰城入奮勇獨爾鋒爭嬰大呼殺賊賊  
幾卻痛無繼者悲填膺洞胷穿臆尙不已須臾白骨堆從  
橫嗚呼青州駐防兵爾何不駐青州城爾豈獨無父母妻  
子與弟兄爾獨願死不願生來時四百歸幾人乃甘一死  
隸此京口營君不見京口駐防棄城走賊退家室還重迎

卷三  
悲莫悲青州兵

丹陽行

一夕京江告失守十日夷船住江口既不進犯亦不走丹陽居民徒紛紛兒號婦哭知何奔西門北門皆敗軍太守縣令各傳語張官渡口險可拒亟塞破船作防禦吁嗟防險夫何爲金焦豈不高崔巍誰能知賊來不來

城西門行

喧闐車馬城西門連雲屋瓦排魚鱗綦冠珠履競出入衢衢珍錯紛羅陳海上黃塵起一夕飛鳥頓化新燐碧可憐蜃蛤魚鹽邦羅刹風吹卽鬼國君不見珊瑚寶玦王孫無舊時傭販皆紈襦盛衰轉轂吁可畏經過淚眼看模糊

冬至日雷電

去年冬至雪三尺今年冬至無寸雪冬至無雪亦尋常雷  
電何由忽交發初疑耳目或眩昏漸聽兒童共驚說怪底  
連朝窗牖閒凍蛸僵蠅盡飛出暖氣豈獨昆蟲知枯樹槎  
枒欲萌孽冬行春令且勿疑天意仁慈或難必閔此災黎  
兵燹餘卒禦嚴寒少裋褐徧覆誰真有大裘聊弄陽和護  
窮骨不然兵革連東南茲亢陰潛肆句結頻年撻伐威難  
彰一怒因之奮赫勃五行占驗非我知氣數無憑敢妄述  
陰陽衰盛理可徵仰視蒼蒼自憂切

湯雨生有詩見懷寄此奉答

雅歌投壺祭征虜緩帶輕裘晉羊祜從來名將皆風流豈



獨桓桓說千古君家忠孝人能知詩名況久稱當時君更  
書畫號三絕雍容儒雅爭相師解甲歸來素琴抱小築鍾  
山寄嘯傲報國難忘舊日恩授弓時作鴈鷗叫誰料夷  
商忽盜兵烽煙竟逼金陵城詔起將軍佐防勦怒氣直  
欲吞鯢鯨我時刺促圍城守耳聽驚濤雜刁斗相望日夜  
魂飛揚得免死亡亦其偶感君念我心不忘江頭問訊空  
旁皇事定重煩一詩寄讀罷清淚霑浪浪歎息風塵正難  
定繞朝有策知誰贈且把君詩萬口傳敢但逢人唱競病  
君不見前明郭定襄騷壇號令亦復千夫聽

遷徙歎

里巷謫傳賊船至一日遷徙復數四問爾欲何遷出門但

隕涕東西南北皆非鄉關河冰雪生旁皇妻嘯子哭徒悲  
傷鄉鄰智者勸且阻賊無他意來何妨君不見制府安民  
有告示一語傳來自公使爾但勿欺彼自知遷徙紛紛太  
多事

摸樁

堅城萬仞竟難支馬革誰拌自裹尸  
犀兕歌中悲宋甲烏聲裏樂齊師  
風淒敵壘胡笳切雲壓長江巨艦  
馳何幸摸樁能殺賊當時只恨少  
人知

李太常

湘茶

檄赴淮南詢江防方略賦呈

兀坐方深漆室憂忽聞飛檄過揚州  
腐儒那識匡時略當局應多未雨謀  
草澤人材今豈盡江山形勢古長留  
指揮

若果如公意制挺從來勝戟矛

癸卯

元旦寓淮陰侯祠俗例閉市幾不得食示懋兒

不是淮陰祠畔住那知一飯古今難元辰有幾偏爲客經  
世無才轉自寬萬死驚魂今日定此生餘願夢中看兒童  
未識征途苦祇覺深宵雨雪寒

贈龔藍生

照刊

大令

龔侯好讀左氏傳怪底胷中甲兵滿浮沈下位不得意眼  
看時事動憤懣相逢一語感相許便與深衷吐款款昨年  
京口騰夷氛兵刃未接軍先奔長江天險自古說胡爲揖  
盜先開門輪船竟使石城抵飛章入告驚 楓宸所求一

一務如約不爾便欲來天津雖曰不要吾不信包藏姦惡  
彼何人我曾芒鞋走鄉曲徧與鄉農訴且哭鄉農爲我言  
夷人非是虎狼乃豕鹿困雖猶鬪走無險苟有長繩不難  
縛船堅礮利皆妄言纍纍縣旆假以木桅竿瓜瞰皆木爲之拋江屢  
試賊膽裂洲民沈賊江心謂之拋江不敢犯村敢犯郭君聞此言氣不  
平謂須先議裁官兵賊如再來集我民結以金帛喻以誠  
自保鄉里衛妻子何憂衆志難成城知我來奉使者檄勸  
我張膽言其情古來不少賈終輩策勦何必非儒生嗟我  
愚憊豈有識慷慨逢君矢感激一權明朝便擬歸臨行莫  
贈繞朝策

邵子顯閔余遭亂爲刊舊詩四卷寄此誌感

寒儒少長物積書尙充戶寇盜突見侵狼藉委塵土盜去  
拾叢殘十已無四五中多先人遺丹墨痛重撫平生所管  
窺此本不足數獨幸詩數卷早達故人所故人閱我窮爲  
我省束脯亟亟鐫版傳遠寄隔江滸苦吟歎白頭新語未  
一吐何能翰墨場妄接騷人武況茲患難餘隱痛切心腑  
浮名豈所論遺恨邴堪補厚意感君深餘生敢不努竊恐  
覆醬瓿未勝付一炬知我無如君此誼真千古

甘泉朱大令

子庚

寫梅見贈賦謝

畫到梅花便欲仙使君風格自翩翩廣平才筆誇今日何  
遜詩情動昔年不信傷離遭亂後依然疏影暗香邊一枝  
分得江南去愁滿春風驛使前

辛丑冬湯雨生寫琴隱被水圖見贈有詩和謝遭亂

遺失因乞補畫雨生亦屬錄前詩感寄

前年汜濫遭江水書劍漂流失棲止  
昨年倉遽傳寇烽道路呼號更安徙  
自言身是故將軍報國丹心老未已  
已幸全家魚鼈逃肯教稍縱虎狼死  
奉命慨然起據鞍便擬機槍埽眼底  
聖主如天浩蕩恩欲全蒼赤宣溫旨就  
撫仍寬京觀誅罷兵得復琴書理  
忽念丹青題句人死生同感兵戈裏  
慰問殷勤遠寓書在亡瑣細徵圖史  
贈畫題詩憶往年淒涼夢醒悲今始  
君畫真疑破壁飛我詩適合埋馬矢  
賊見書俱棄馬矢中但願全弭伏莽戎  
何妨重拂烏皮几感激瑤函聊報君  
隕涕臨風欲滿紙

金山望江

崔巍金碧歎依然亂後重尋恨未捐  
指點江流最深處去年曾駐火輪船

二鬼

浮雲黯黯天無光猙獰二鬼嬉其旁  
二鬼姓氏不可識冠裳劍佩何軒昂  
一鬼舊居天帝鄉盜食天祿飲天漿  
一鬼本非赤標族威假司命來炎方  
風車雲馬肆鉤結竊弄威福矜披猖  
山魃木魅受服役射工魍母相趨蹌  
翻騰海浪鳩白晝噓吸毒霧迷昏黃  
飛天神王不能制恣其叫嘯凌穹蒼  
姦巫報賽顯靈異焚燒日夜空冥鏹  
岳瀆尊神且相避卑卑況敢爭城隍  
天帝高居不察識誤謂造化資匡襄

手執斗柄侍左右能令下土無災殃亦嘗赫怒荷譴謫天  
戈無力揮櫓槍幡然佐治復分命安奠仗爾臨窮荒內外  
交煽勢愈烈蛇首人面羣驚惶別有一鬼非險惡稽籍不  
隸閻羅王但工諧媚事二鬼有覩面目慙文昌我聞鬼老  
亦漸滅豈有二鬼獨久長安得鍾馗數十輩噉爾魂魄禿  
爾強高揭兩曜炳霄漢祥光瑞靄開清閭

王亥坪輯張中丞集屬題

睢陽城破中丞死三十六人生共恥駢肩就戮古所難公  
之所難不在此初公慟哭來睢城羯胡已陷東西京乘輿  
還播未知所二十四郡降爭迎當時公卽棄城走此心豈  
便朝廷負無睢陽是無江淮一步何容更退守可憐坐困



九月餘大小百戰晝夜俱鼠雀食盡繼以妾援兵竟絕徒  
捐軀全師歎息此誰擁項刻城頭賊騰踊說公往事知公  
難豈獨臨危一呼勇公今相去逾千秋遺文軼事誰能求  
光山明府抱深意正氣欲藉公長留我讀此集尙公恨廟  
祀巍義久斯郡何不爲厲殺鬼夷忠義人間令知奮

酬張澄齋醇太守

曾聽霓裳便自賢世途毀譽最堪憐曲鉤不信吞魚易直  
木從來受斧先縱說相如能作賦祇應陶令解揮絃千秋  
畢竟知誰貴且得逢君一醉眠

牆外叢竹斬伐盡矣忽見新筍喜作

淩霜老幹惜全刪忽見貓頭茁滿山寄語老饕休更斲好

留直節在人間

金沙道中

官塘水落岸如天上瀨船真百丈牽紅斂夕陽疑有雨青  
分遠樹澹無煙渡頭潮過椿全露柁尾沙膠櫂不前歎息  
麥田秧徑寸可堪亂後更荒年

哭王亮生

不堪執手遭兵後已是傷心永訣辰經濟高談羞管樂圖  
書搜討誤周秦結交四海誰名士獨抱千秋一病身流涕  
故園風雨夜著書慷慨更何人

酬張詠仙

聒耳方喧譁君至胡弗喜若有數萬言語君不能已方今

盛公輔人自皋夔比時事敢妄論身憂正何底我本蓬牖  
人飯飲但疏水可堪羈旅中遭難更遷徙長物餘青甌棄  
之如脫屣今雖免死亡豈便飽薇芑豺狼尙滿路魑魅亦  
城市非不思故鄉風雨少棲止衰病況日增朝暮得自恃  
君聞動嗟咨憂貧素深恥飢寒奈侵尋嗁號日盈耳胡能  
坐環堵歌嘯聲四起杜陵感杯炙退之歎芻米慨然思古  
賢安禁淚如泚一家數十口舉火盡君倚肫肫孝弟風世  
況罕君儼天胡嗇其躬坐使困田里東山彼何人赤舄豈  
凡凡四海方晏然誰敢越刀匕側聞薦賢牘不少山公啟  
貢君儻玉堂圭璋共踰濟未必藜藿腸食肉便自鄙蠻觸  
爭笑蝸腥羶慕嗤螳江湖勢滔滔道路行靡靡如我復何

論得歸亦已矣豪語聊爲君窮愁暫君洗

白門遇程序伯次韻奉酬

復向江頭聚風中雨斷蓬多君詩入細憐我病偏工慰藉  
情何已漂流遇更窮祇餘燈影在猶作昔年紅  
不堪兵火後重與話平生圖籍他年劫桑麻故國情素心  
知幾在倦眼此同明莫更傷離別風塵幸已清  
惆悵秦淮路西風願屢違墮鷺驚跼跼殘柳故依依久客  
身兼病無田歲沉饑蹉跎俱五十豈是未知非

送崔正甫

光笏

太守之松江

津門太守人中傑文采風流耀同列愛士無過韓昌黎嵩  
也何由敢稱說江頭鼙鼓秋風驚戰場白骨堆從橫撫綏

周弊豈易事誰能坐治稱神明維公佳政傳山右五馬南  
來此權守流亡滿眼生悲傷疾苦殷勤問童叟自言理譜  
有家傳最好親民七品官竹符銅虎恨早綰青鏡肯忘虛  
堂縣蒼黎已見甘霖膏國殤更感荒城弔自製豐碑勒道  
旁表彰忠義還祠廟時爲青州兵建碑立廟論詩政暇比韋公燕寢  
香凝有古風會無得意驚人句也許吮毫入座中金焦風  
景今依舊板輿歡奉當耄耄可獨清名一絹承還看萬石  
恩同厚恩恩琴鶴返吳淞望鞭截鐙知誰同庾樓明月雖  
千里卻幸江湖上下通

哭程喬堂銘

斯人不八十天道竟安論雅量世誰及高風今豈存亂離

悲白首生死痛黃昏檢點空書札難招江上魂

寄張筱霞

貧過終身病過年更經離亂雪盈顛親朋故國書遙斷廬  
墓他鄉夢獨牽高樹亂鴉催落日荒郊走兔伏暝煙釣竿  
欲拂知何處可但思君鎮不眠

聽繆心如

嘉穀

談浙東死寇王將軍國英事

繆生昔著從事衫從軍直挂海上帆飽看浙東戰場事酒  
酣爲我奮袖談自從四明督師歿賊騎長驅遂深逼與兵  
棄甲數郡縣曾見何人手擊賊大呼獨有王將軍揮刀躍  
馬真天人勢窮援絕竟遭縛勸降羅拜還紛紛將軍兩目  
怒直視豈有蘇卿肯惜死傳聞血肉飛從橫戟手詈賊尙

不止乾坤正氣何代無常山睢陽皆匹夫吾頭可斷身不

辱焉能效彼全軀徒同時拒敵有朱備

守備朱貴  
戰歿慈谿

相遇慈

谿正兵潰奮勇殺賊祇一身凜凜須眉死何愧誰言四海

無雄兵三年白骨堆荒城可憐撫議定不早從令宿將皆

捐生將軍何名國英是協鎮金華調守此死事何人大筆

書名繼陳家兩父子

廣東協鎮陳連升及  
子鵬舉同殉香港

懷張詠仙時有喪明之痛余亦初失第二孫

剝啄休疑客到門傷離忽別正黃昏空齋寂寞南州榻故

里蕭條北海尊病起可堪重哭子祚衰何得望添孫京江

樓閣蘇臺樹風雪相望一斷魂

過江

蕭騷風雪一扁舟又送江潮入海流他日樓船橫北固側  
身短檣過瓜州鼓鼙動地魂初散烽火連天夢尙愁不分  
珠簾歌舞地此生無恙得重游



意菴山館詩稿卷五終

孫潤庠曾孫家振校字

意苕山館詩稿卷六

元和陸嵩希孫著 男懋修九芝校

甲辰

江口偶詠

東南形勝此重尋兩點金焦自古今  
獨向江頭理舟楫不知誰有濟川心

歷覽

歷覽興衰未有涯眼中人物想乾嘉  
淒清高會南樓月寂寞春風上苑花  
雷動牀頭紛鬪螳雨餘井底亂鳴蛙  
何當一瀉銀潢影萬里重尋博望槎

述古

秦興廢封建郡縣始分置雖殊各君國一切得專制經行  
苟修明其治自卓異後世重令甲動輒聽朝議斷獄雖得  
情科罪或違例駁斥必再三權但授胥吏自餘盜賊課下  
至農田細縱抱經世才那得略行意毋怪軒冕徒詩書率  
輕棄龔黃彼何人循良譽誰繼

任賢貴勿貳聖訓垂煌煌政苟出多門治或亂厥常蕭何  
佐炎漢曹參無更張道雖雜王霸一代稱明良漢後論得  
人姚宋追杜房何以開實際轉轂分興亡用相非不專奈  
此李與楊權賄方政府鼓鼙已漁陽知人帝其難而況百  
世王邊患豈足憂太息中書堂

周禮無諫官無人無言責自設諫議臣外此皆越職有道

稱漢文賈董尙遷謫況逢恩譴朝何怪盡緘默陛下容臣  
言臣故死不惜不然冒嚴威誰敢鱗披逆善乎魏元成眞  
有回天力所以貞觀間君臣致一德昏庸彼何知讒諂正  
滿側方謂闕事無定覺語言激禍亂痛已成乃始詔求直  
斯時亦何用空恨言路塞

漢代守土官州但任刺史令長居其下治各分百里繡衣  
雖閒出未嘗撓其紀權旣得自專祿復有餘米誰甘貪墨  
蒙不自廉能砥法令一以紛吏議日無已使星徧道途九  
州少安邸非獨供億煩且苦送迎遞其間不肖徒趨承忘  
卑鄙賄賂飛縱橫公怒或變喜藉非膏腴民烏能橐傾已  
省事先省官此言有至理

三苗雖人類其迹近禽獸倫常豈所知貪很習戰鬪何時  
入中國流毒徧宇宙遭逢堯舜朝尙敢肆戎寇慙使冠裳  
侶相與共熏覆舞干雖暫革未改凶頑舊不然三危山分  
背曷其又豕狼何代無驅除豈容後文德與武功所用各  
有候湯武亦聖人水火征誅救

世治固尙文時危亦重武所以將帥臣聞聲思鼙鼓尙想  
劉項爭兩雄各如虎淮陰一登壇勢已無全楚苟非蕭何  
薦碌碌噲等伍大功何由成見疑比亞父雄才代不乏髀  
肉每悲撫權姦內未除勲業外安覩盜兵偶潢池倉皇已  
堂廡千載幾興亡居今豈忘古

守令自古重謂是親民官民親必由漸任久情自然上下

苟未習邴免相欺瞞不見郭細侯重至兒童歡亦有河陽  
民借寇千秋傳云何託調劑皇皇席不安官舍視逆旅更  
代無停驂何暇問風俗況復閔痾瘵貪婪致日盛不憚譏  
素餐緬想古循吏俯仰徒三歎

唐專重進士宋以宏詞通詞華豈不貴剽賊匪由衷流弊  
至帖括空疏便愚惑所取盡浮僞其勢能無窮計惟復漢  
舊舉察本至公世情縱日薄矯飾亦易蒙人人慕孝弟悖  
逆自不容人人務廉恥貪鄙誰肯同始雖不免僞久之漸  
成風人才與世運自古相污隆仰觀東西京治道終雍融  
天道本非遠璣衡察可見運行苟有差人事必多變雷霆  
況非時彗孛更頻現自非政令乖曷由災異鉅疇司變理

權高位坐安晏漢家罷三公亦庶答天譴詔況罪已頒士  
更直言薦豈但故事循修省避正殿而胡褻天徒消改慢  
法憲母謂此難知應感疾於電

陰陽有消長王道分隆污疇能混賢姦使之併一途虞廷  
任皋禹四凶自放殂讒殄苟在側何以來嘉謨胡乃漢唐  
世黨禍若合符朝政謂無闕毀謗庸足誅以此肆排間善  
類傷同誣禁錮忿未洩慘痛遭駢屠人亡國殄瘁喪亂將  
誰扶悔悟縱一朝權失勢已孤焉能更乾斷發憤諸姦圖  
覆轍蹈青史尙論空悲鳴

追悼路質軒王芑泉寄曹二香

漫從百尺望高樓感慨無端已此留今日始知懽會少當

時未覺性情投荒池雨過蛙聲鬧廢院風來鳥語愁寂寞  
青氊更誰問懷人傷逝兩悠悠

徐秋士起復入秦枉訪卽別

吳雲秦樹兩冥鴻相見還疑是夢中萬死驚魂憐我在三  
年老病惜君同宦情久淡歸猶滯喪故頻經過更窮從此  
已非親在日此身拚得各西東

書徐太僕

憲卿

留垣疏草後爲秋士作

黨禍倉皇痛天啟楊左冤獄猶未起誰先一疏發璫姦南  
太僕公憤切齒緹騎四出朝野驚六君子死公竟生死生  
有命璫奚爲公豈預料彼先傾當時羅織首高邑姦謀未  
遂道州謫天留老眼思陵朝與公同看元凶殛招權攬賄



徒紛紛乾坤正氣千秋存讀公遺疏識公恨深宵憤激還  
沾巾

張詠仙撰楊節母傳寄題

昨獲張生書寄我節母傳節母知爲誰氏桑舊門媛於君  
爲外姑君言故非謾母自殞所天身殉誓朝旦徒以呱呱  
兒勉聽孀姑勸忍死十四年一綫慘中斷婦姑相抱持哭  
聲動悽惋夫祀苟可延辛苦復何怨嗣子幸有孫庶稍慰  
母願傷哉營巢燕集成雨風悍不恤殫紅襟銜泥自悲喚  
可憐孫更殤形影痛誰伴造物胡不仁迭降禍莫道苦節  
豈竟負天意會默轉不見青青葉春來發枯幹矧彼松柏  
姿雨雪每相鍛楊祚看終延母勞閭閻開自古保祀難一

死又奚判不然杵臼嬰史策何交善旌門非母心令典自  
輝煥女夫況能文懿行賴紀謨報母亦不薄撫讀起三歎

唐春齡自關中來卽返吳門

一同相見一同老爲客君今二十年最是往時多涕淚不  
堪送別正烽煙江湖歲月傷遲暮風雨家山感變遷形影  
此生能幾合交期直欲盡重泉

得徐秋士途中見懷詩次韻答寄

倚櫂一書至知君第幾程不堪風雨夜同此別離情薄宦  
憐多病長途幸罷兵相看俱白髮應悔者番行

閒眺

偶然閒眺廢高歌妙悟原從靜裏多樹影漸圓知日午爐

煙欲直識風和浮雲終竟難成雨止水由來不起波寂寂  
一編無客到幾時容得守槃阿

春日偶成

春草離離日夜生春愁偏與草相爭自憐多病仍爲客已  
是長貧況被兵杜甫看雲空有淚右軍誓墓總何情惟餘  
一事成吾樂四歲孫能辨四聲

放歌

生不願交賈人子握算持籌坐城市沾沾心計惟錢刀較  
量錙銖不知恥一朝得勢居要津度支盈絀書屢陳要使  
內府貫索朽此豈無術當問臣椎茶禁酤事已細閒架稅  
陌亦非計別有權宜富國謀世無知者欲誰議君不見鑿

山治銀策大廷以利規我非桓靈斥還私第何足懲大哉  
王言萬世利如萬紀者乃效商賈爭奇贏

生不願交吏人子曰抱案牘公府俟何者曲直何是非上  
下但爾兩手視出門豪貴如達官珊珊駿馬黃金鞍酒家  
醉眠過日午歸來傾囊妻孥懽上自公卿下守令豈盡甘  
心處分聽例案不習可奈何那得爰書手自定君不見指  
陳得失中書堂書幣充塞來四方一朝身死家亦亡鄭鉢  
滑渙世不乏誰能與之夤緣鉤結軀命忘

### 示洲民

我昨挂席來江洲洲民迎我飲我酒我不能飲起相謝笑  
我尙未識誰某座中一叟牽我衣顧我欲語色先忸自從

道光九年來此地水災苦已久豐年偶遇不救飢十室流  
亡已八九傷哉前年更被兵老幼扶攜慘奔走繪圖不逢  
監門賢作歌豈有道州守恤民幸逢縣大夫一再請蠲意  
獨厚頗聞上官心忤違嚴劄行查下左右舞弊并疑催租  
官白簡高持欲彈糾叟言未畢我慨然搖手謝叟此大否  
上官本無苦民意誤聽母乃吏胥口縣大夫賢素所知豈  
有私意暗相授二十二年以前租概予免徵告我 后爾  
民應感上官恩今歲輸租慎毋後叟聞我語歸歡然徧告  
里翁及鄰婦大戶小戶看今朝爭向官廳負升斗從來澆  
薄多市朝感激能真獨畎嗟嗟微祿安足論折腰未免  
恥誰咎慚愧殷勤父老私但祝從今歲頻有

夜熱

炎歊苦三伏蒸偏已十日義權竊知誰向晚愈怫鬱火織  
撐空霄洪爐布密室牆壁拊若燔幬幙觸如熨繁星燦不  
搖湛露浥疑竭惡卧掌敢焮握扇臂欲折昏昏此銀河赫  
赫亦明月喘竟動吳牛吠乃效蜀鴉噴體矧苦蟲吮血詎  
殊蠹妄思冰沁喉祇覺汗流髮簿書堆幸無眠食廢豈不  
終夜徒叫號當晝得休歎憂來已如悵病侵堪更暘炙手  
勢莫犯熏心癘應絕却笑夏畦徒尙慕秋陽烈何當喚西  
風一掃天下熱

柴門

柴門依樹結門矮欲穿樹客來不入門但與倚樹語

村霽

江村新雨後暮色上柴扉歸鳥方爭樹流螢欲點衣遠山  
雲外濕纖月隴頭微暫結柴桑伴悠然坐釣磯

圖山

來往圖山路知今第幾同峯高雲欲礙塔小霧初開隔岸  
空漁艇臨江尙礮臺風波吾久慣魚鳥不相猜

秋夜有懷

雨過氣覺秋涼意變林木蕭蕭敗葉聲時有亂蟬續流泉  
滿碧池疏簾引寒淥河漢正橫空天宇淨如沐落月淡微  
雲餘光入修竹對茲百慮空悠然見巖谷美人在何處獨  
坐企芳躅

檢殘篋得亡友謝杏根詩感賦

詩以理性情一言蔽風雅性固有其真情亦何容假時鳥  
弄啁啾好花發嫣姪花鳥詎有知留連尙不舍何況倫常  
閒無憾亦云寡感激非由中性天曷以寫嗟彼炫奇徒隱  
僻恣撻摯詩教之所壞世風日以下生平溯交游此意孰  
傾寫謝君曾閔流其才亦班馬歌泣驚鬼神遺篇想揮灑  
茫茫隔重泉思之淚盈把

初五日見月

忽覺清輝皎微微落日邊若爲能永夜可惜不當天雲霧  
何時斂風塵薄海連虛檐凝望久獨立祇生憐

懷古



天官占驗問誰諳紫氣還聞滿劍函內府輸財先卜式三  
章守法想曹參新豐未賜當年復瓠子猶停使者驂卻喜  
漢廷風雨夜有人民力念東南

聞有以蘇松糧重議廢漕運改採買者感之而爲此  
詩

江南重財賦尤者稱蘇松害始趙宋末買田備荒凶元明  
繼增益籍沒俱歸公一畝稅石五狼藉輸贖雖雖然苦吾  
民未至羣恟恟蓋此官田租本與民田同租額非糧額轉  
納惟鄉農自從罷官田令民自爲供稅糧混無別業戶乃  
憂忡有明中葉時閔此勞深宮均田下明詔一再拯疲癯  
豈知官民田科則由此通官田則雖減民則加重重貧富

乃交困與國相始終我朝沛恩澤尙想康熙中睢陽一  
疏入惻憫開宸聰畝取斗九升官式頒釜鬲毋許稍充  
溢懽聲徧江東而胡百年來兩郡民愈窮迢遙望京邑水  
陸途交衝運船高且大飛輓殊短蓬役夫萬千計此輩皆  
官傭誰能口罄罄效彼孤飛鴻加以衛官弁并及倉胥僮  
所費良不訾矧伊擁幡幢驗收與開兌各各苞苴充嗟嗟  
彼州縣豈盡家素封浮勒苟遽革禍患卽我躬因之不肖  
者私橐且自豐軍興況昨載供億煩郊墟何能更搜括彌  
此倉儲空斗米論折色九百青青銅按畝計所穫那望餘  
貲甕十室九懸磬典鬻悲兒童有秋且如此堪更凶年逢  
呼號問孰恤蠢動虞私衷風聞西臺彥國計憂心胷變通

有良法論奏思雍容深知西北食不藉香杭紅雜糧徧採  
買近自燕豫雍商販免關稅亦易舟車通南漕聽民折轉  
運誠何庸歲省無益費足抵挑河工江頭萬糧艘自可備  
戰攻丁夫皆健兒何患難卽戎一舉數善備此論豈駁躋  
積弊果盡返庸止利愚蒙我吳俗非悍禮讓本交崇自從  
因杼柚暇復鼓鐘鏞廉恥日以薄知識日以懵安保詩書  
俗不變爭鬪風殆哉勢岌岌有若將傾饑民食一朝足挽  
同易湍淙豈惟此邦樂終歲飽冬春行見利所溥四海銷  
煙烽當事彼何人 恩遇 三朝隆曷弗贊我 后成此  
堯舜功腐儒家無田不識桂與種厚斂非所憂私心乃憧  
憧

題武進湯孝子荀業與竹軒詩稿後

詩以教忠兼教孝忠孝能全卽詩教無詩亦傳況有詩詩  
導性情由此導我讀孝子詩我思孝子罵賊時鳳山城頭  
黑風吹刀光血光相護持父死忠子死孝父忠子孝兩得  
之不識孝子請視孝子詩吁嗟乎孝子去今五十載又見  
烽煙起南海陳家父子殉賊烈烈亦可稱謂陳連升及子  
鵬舉香港殉難  
事流傳惜少詩篇在讀孝子詩使我愴然涕淚橫向卷端  
灑

秋思

西風落日不堪思無那高樓極望時蟋蟀一庭悲戰鬪  
蛛滿戶枉綸絲浮雲莽莽天長合病葉蕭蕭樹暗辭何處

一聲吹玉笛淒清惟有老猿知

雜詠

權自有輕重乃能重輕物不聞混黍銖可以準圭撮奈何  
鑑常昏欲使妍媸別鵲鴉以爲鸞松棘以爲橘堅冰謂不  
寒熾炭謂不熟物情豈反覆應感理不悖琥珀以引鍼母  
怪芥亦失持荷作棘梁雨風歎摧折

貧賤難爲容富貴易爲好內美固足恃外飾焉可少朱門  
雖遽條被服盛紉縹粉黛況雜施珠玉復綴繞何怪耀俗  
目通詞競媒媼可憐絕世姿辛苦習荼蓼荆布體不完容  
光那皎皎美惡本不定枯苑勿復道茫茫宇宙間何事不  
顛倒

居卑無隕墜獨處無排擠世人慕榮顯禍患潛幾微高明  
室瞰鬼豈必積怨疑暑寒有代謝日月不並馳盛極衰早  
伏天道恆若斯常貴不能賤戚戚徒心脾何如習窮約疏  
水足自怡不見塵寰中隨處多危機

冰炭每相害矛盾各自利疇能雜薰蕕併之同一器青青  
九畹蘭蕭艾輒憎忌翱翔鷺羣文采世矜異梟鳥得免  
猜冥冥貴早避僉壬勢方張婞直衆爭棄一筮夫九三獨  
行遇隕涕

朝元曲

一自天魔亂舞筵排雲何處望羣仙高臺已少金銀氣要  
問天孫舊貫錢

滄海從來水易乾記籌聞亦少仙官蕊珠宮闕高寒甚選  
罷黃冠選女冠

翩翩野鶴自千秋一夕乘風闔苑游怪底西來諸老佛不  
騎獅象便騎牛

聞道樓成白玉纔上梁也要選奇才莫愁蟲鳥書難識袖  
得雲霄秘笈來

絳節雲輶望翠微瑤池消息近來稀應知孔雀東南盡肯  
遣青鸞更北飛

箕尾依然北斗環淮南雞犬亦仙班如何青鳥偷窺客一  
謫人閒便不還

涼露清霄又暗零飛飛烏鵲斷空冥銀河風浪依然闊愁

殺牽牛織女星

流水胡麻飯未忘  
藍橋重飲感瓊漿  
嵇康自恨無仙骨  
齒冷難誇白石嘗

有客篇

有客示我制舉篇曰此取士二百年安溪桐城盡卓絕此  
中豈必無豪賢法久必敝至今日空詞敷衍陳編清真  
雅正復誰識前民典則何有焉文字盛衰非細故恆與世  
運相周旋卽如有明盛詩教青田崛起長沙前疇其繼者  
何與李蘇門昌穀看駢肩鼓吹休明潤鴻業一時風雅矜  
翩翩後來鍾譚競繁響蛙聲紫色紛喧闐狂瀾旣倒勢莫  
挽風移俗改運隨遷譬若貧兒罄囊囊空空那復餘一錢



啼飢號寒尙滿室山珍海錯誰羅筵方今昇平正四海何  
得切切彈離弦淋漓大筆定有屬願更仙樂同鈞天

### 海市謠

咸池浴日光騰紅半空雲霧圍溟濛腥風挾浪起衝突平  
波涌出蛟龍宮蛟宮估客紛來往錯列珍奇炫恂悅暗中  
龍燭誰能移沈洲幾腐珊瑚網須臾雲散天昏黑貝闕瑤  
樓隱飄瞥手無并翦徒望洋冰綃那得臨風截吁嗟乎人  
閒金箭何處無鮫人淚點空模糊

### 兩船謠

前船遲後船速後船已過萬重山前船未離江之曲前船  
反後後船前遲速終朝已反覆問爾何遲彼何速後船蒲

帆飽十幅前船柔櫓搖波綠吁嗟乎前船何不學後船爲  
道曾經風浪惡

讀陳侍御慶鏞疏

一疏傳來喜更驚小臣忠愛本平生紀綱但使埋輪肅狂  
直何煩折檻旌終古雲霄縣日月百年滄海靖鯢鯨從容  
漫詡回天力從諫如流自聖明

射虎行

翩翩少年誰家子挾彈操弓過都市自言膂力能絕人射  
虎不數李將軍南山獵獵風沙狂林木摧振天昏黃吁嗟  
白額何處藏訓狐作人踞匡牀據鞍顧盼徒旁皇勸君且  
歸釋弓弩今但有狐那有虎

世事

世事悠悠總可哀  
百川東下幾時回  
通經昔羨桓榮抱  
牘今誇滑渙才  
厝火積薪憂正急  
補卮塞漏議方開  
眼中人物知誰是  
日向高樓望斗台

聽閩客談廈門死事諸公本末紀之以詩

道光辛丑夏四月撫議有成  
粵防撤是何狡獪  
帆忽揚鼓浪嶼頭  
肆豕突回兵直進攻  
廈門廈門重鎮藩七閩  
官吏恃和不設備  
踰賊至爭逃奔  
何人拒賊誓死戰  
金門總鎮江繼芸  
從而起者閩將  
沈志都司王公  
世俊勇絕倫  
水師把總李  
啟明楊肇基  
紀國慶或鯨腹葬  
或刀殮浩然正氣  
留乾坤天陰月黑  
來忠魂嗚呼是役  
死事何其烈宿將

材官盡此歿粵中大帥又議和徒使英雄皆憤裂

意茗山館詩稿卷六終

孫潤庠曾孫家振校字